

史料旬刊

第三十七期

清道光朝密奏專號第二



故宮博物院文獻館出版物廣告

文獻叢編

本館前刊掌故叢編出至第十冊現自第十一冊起更名文獻叢編體例改善材料加多售價照舊(每冊五角)第十輯業已出版

讀書堂西征隨筆

(清汪景祺著)

定價

粉紙每冊六角
毛邊紙每冊五角

影印交泰殿寶譜

每冊一元

鈐拓故宮寶譜

每冊三元

影印籌辦夷務始末

道光朝全書四十冊售價二十四元咸豐朝全書四十冊售價二十四元同治朝全書五十冊售價三十元三朝全書售價共七十八元

雍正硃批諭旨不錄奏摺總目

每冊一角

名教罪人

每冊五角

清代文字獄檔

已出二輯 每輯五角

清軍機處檔案目錄

每冊三角

清太祖實錄

每冊六角

史料旬刊第三十七期目錄

清道光朝密奏專號第二

(一)奕 顥 片一

(二)賽尙阿 摺一

(三)伊里布 清單二

(四)陶 澍 片一 清單一

(五)烏爾恭額 片一

(六)朱士彥 片一

(七)鍾 祥 摺一片一

(八)敬 徵 摺七

(九)顏伯燾 摺一片二

(十)周天爵 片一

(十一)牛 鑑 片一

(十二)怡 良 片一



(十三) 周春祺 摺二

(十四) 吳文鎔 摺一片一

(十五) 祁窩藻 摺一

(十六) 布彥泰 片七 清單四

(十七) 寶 興 摺二 片二

清道光朝密奏專號第三

奕

顯

嘉慶二十五年授黑龍江將軍二年調烏里雅蘇台將軍三年召五年授遠城將軍七年調盛京將軍十年調烏里雅蘇台參贊大臣旋調

庫倫辦事大臣十一年免十二年授盛京將軍十四年發往軍臺効力二十年

十六年調戶部旋調盛京將軍十七年回京十八年發往軍臺効力二十年
起為理藩院右侍郎旋以重聽休致

片 一

再奴才奕顯前於陞辭時面奉諭旨著奴才到任後察看盛京五部侍郎等為人辦事若何據實密奏欽此欽遵奴才自接署將軍印務以來留心體察盛京戶部侍郎德春人尙明白禮部侍郎兼管奉天府府尹事務薩迎阿人謹慎管理地方尙能振作刑部侍郎兼署兵部侍郎惠吉人端方刑名諳練辦事詳慎惟訪查工部侍郎奕澤操守不謹物議沸騰府尹圖明額無為無守不能整頓地方再盛京副都統祿普老成謹慎錦州副都統奇明保辦事尙可熊岳副都統國祥年老辦事遲鈍奴才受恩深重不敢稍涉瞻徇廻護理合據實附片密行奏聞謹奏

賽尙阿字鶴汀蒙古正藍旗人嘉慶十一年繙譯舉人授理藩院筆帖式洵遷

部二十一年海疆戒嚴赴天津山海關勦築礮臺復偕僧格林沁查閱海口

防善後事宜三十年兼步軍統領協辦大學士咸豐元年尚書赴江南查閱江

臣赴湘防堵未幾星沉卒馳往督師授內大臣六月至廣西二年擢職速京

軍臺尋釋之十年回京總統左翼巡城事宜

摺一

奴才賽尙阿跪奏為涕泣瀝誠據實詳述奏求聖鑒事竊奴才一介蒙古世僕

年未四十荷皇上特達之知由筆帖式擢至侍郎不過六年受他人未受之恩

十一年間同富俊出差時跪聆面諭以富俊為師法而訓之以臨大節不可奪

之語無時不感澈涕零奴才自顧何人乃蒙聖心期望如此奴才具有人心豈

能片刻稍忘恩諭惟有竭盡血誠稍効犬馬以期仰報高厚鴻慈竊思人臣大

節首在乎廉此處一失萬事瓦解是以夙夜小心不敢有一介非義之取上年

六月奴才奉命往廣東會同昇寅審辦金蘭原之案由京馳到粵省奴才在途

訪聞金蘭原聲名狼籍物議沸騰又昇寅為人奴才不能深知白讓卿更未謀

面竊恐金蘭原巧於鑽營神通甚大因此處處留神體查秉公研訊乃昇寅果欲開脫金蘭原處分不令壞官奴才不敢稍有瞻徇極力與之相持勢將兩議奴才已自備單銜奏稿昇寅始肯折從奴才之議此係在粵實在情形昇寅雖故現有陽金城白讓卿目覩迨由粵前赴湖南途次接奉諭旨審吳毓鈞一案即與昇寅同到肇慶正在審訊間忽據知府珠爾杭阿稟送盧應耀等前來始知有盧應翔唆訟情節奴才不知吳毓鈞爲何如人據該邑紳士羅子彪等十二人連名具呈力保似屬公論可信而盧應翔之同縣葉蔭芝係居鄉凶惡不法由吳毓鈞詳辦已正典刑供內又有謂盧應翔與其相好以此深恨吳毓鈞計圖汚陷奴才因想盧應翔身係職官素受國恩乃敢挾私報復深爲可惡此風若長則地方官鋤一豪惡其黨類即羣起反噬外省吏治將不可問是以欲將盧應翔切實嚴辦庶可斷此惡習此係奴才一時糊塗之見並未稍受隨員聳踊又因盧應翔遠在京師是以奏交祁墳詳加審訊核實定案今有人言奴才於此案聽情受賄蒙皇上開誠面諭令奴才據實奏明此係格外天恩曲賜成全奴才尙有一線天良曷敢稍有隱慝自絕於天惟奴才實無聽情受賄之

事昇寅奴才雖不敢靠但奴才與昇寅在肇慶審案時內外門封鎖甚固並無接見外人迨珠爾杭阿等拿獲盧應耀聲稱有公事面稟奴才與昇寅相商始准開門一同接見此外實未再見一人至陽金城白讓卿二人隨奴才等同住公館封鎖嚴密除審辦案件外奴才又時時突往伊等住房探查意欲令其無一隙之暇得以勾結舞弊在奴才防範之法自揣無以復加倘奴才材力所限尚有未周之處又審辦時接奉諭旨令詳查啖咭喇闖入虎門一事昇寅與奴才派令白讓卿赴省訪查確情或趁此外出之便得以串通勾結實非奴才意慮所及以上均係確實真情不敢有絲毫遮飾總因奴才年輕糊塗辦事冒失未能妥協以致有干輿論幾累皇上知人之明惟有求皇上將奴才重加治罪以為辦事失當者戒奴才實萬分惶悚戰慄涕泣據實遵旨封奏伏乞聖鑒謹奏道光十五年十二月二十五日

伊里布

字辛農鑲黃旗紅帶子嘉慶六年進士授國子監學正出為雲南府南關通判遷騰越知州道光元年擢安徽太平知府歷山西冀寧道浙江

按察使湖北浙江布政使五年擢陝西巡撫調山東丁父憂署雲南巡撫服闋實授十三年擢雲貴總督十九年調兩江二十年秋英人攻定海命為欽

差大臣赴浙江查辦二十一年詔促伊里布進兵規復定海斥其附和琦善
藉詞緩攻獲協辦大學士職暫留兩江總督任以裕謙代為欽差大臣赴浙
督師裕謙勅伊里布遣家丁赴敵船事命張鳳道戍軍臺二十二年予七品
頂戴隨杭州將軍着英赴浙五月署乍浦副都統旋奉命偕著英赴江寧議
和和議既成授廣州將軍欽差大
臣辦理善後事宜二十三年卒

考查雲南巡撫清單

雲貴總督奴才伊里布跪呈御覽

雲南巡撫何煊 查該巡撫何煊為人平正見事明透諸凡政務皆肯用心雖
經大事胸有主宰尙須查看現在滇中邊靖歲豐銅鹽俱旺錢糧稅契年清年
欸吏治近好倉貯亦實以何煊平正明透撫治全省足堪勝任惟事緊得平事
寬恐弛奴才愚見仍常濟以嚴肅用期剛克柔克兩有裨益而公事庶不虞其
久而感迨矣緣於本年春間朝覲蒙奉面諭令查何煊謹此遵旨將所查現時
情形繕具清單恭呈睿覽倘該巡撫初終異轍日後有不安處奴才亦即隨時
密陳斷不敢絲毫瞻徇致誤公務有負皇上考察大臣以總治綱之至意謹奏

考查貴州巡撫清單

雲貴總督奴才伊里布跪呈御覽

貴州巡撫裕泰 查該巡撫裕泰才情甚好銳意為公弟有自是之心求治亦不免於太急倘其氣矜之隆始終不化有碍公事奴才亦既隨時密陳請旨定奪現在黔中漢苗安靜政事簡少吏治亦為平順倉儲曾經查訪頗為實貯以裕泰明幹有為撫治全省實堪勝任惟奴才愚見以為才銳失慎事過失平可否仰求皇上格外天恩以虛衷平氣之語訓飭之則欽才就範寬猛得中自可學養日進為人臣中有用之材矣緣於本年春間朝覲欽奉面諭令察裕泰謹將所查現時情形據實陳奏以備睿察敬繕清單恭呈聖鑒

陶澍 字雲汀湖南安化人嘉慶七年進士遷御史給事中二十四年出為川

東道歷山西按察使安徽布政使道光三年就擢巡撫五年調江蘇十年授兩江總督十九年卒澍任江南督撫十餘年於河務漕運鹽政三大政銳意整頓興利除弊頗著成效有殊績焉

片一

再臣承准軍機大臣字寄道光十七年十月初二日奉上諭昨據色卜星額奏拿獲太監鄭進祿一名殊堪駭異安徽距京較遠沿途地方官果能留心查察則太監之聲音舉止迥異常人不難入境即行盤獲又何至累月經年游奕於

數千里外耶況此等小人毫無知識貪黷是其本性所過地方必有詐稱差使恐嚇取財等事在無識者妄以爲內庭供役之人礙難深究或且受其愚弄羣相隱忍即偶有一二盤獲解京者亦概稱訊無不法情事將就完案不知涓涓不塞將成江河姑息適以養奸小懲即可大誠嗣後各將軍督撫等務當嚴飭所屬遇有逃走太監立即鎖拿嚴訊確切根追倘經過地面查有招搖滋事等弊得有確情稟明上司據實入奏除實無不法情事仍照向例辦理外如所犯罪名較重卽著鎖押管解來京沿途地方不得稍爲疎縱倘在狃於積習不肯認真究辦則是封疆大吏竟甘爲若輩小人受過問心能自安乎將來別經發覺朕惟知執法從事重懲不貸凜之慎之等因欽此仰見聖訓周詳杜漸防微之至意臣查太監爲宮庭供役之人豈容任其逃走遊奕於數千里之外是以無論有無滋事犯法總當隨時嚴緝認真查辦斷不能任其混跡計臣蒞任兩江以來曾於道光十二年據丹徒縣報獲太監張來生一名十三年據桃源縣報有投案太監鄭近路一名十五年據銅山縣報獲太監李來喜一名均經訊明或當差辛苦或同事不睦或找尋胞兄逃走俱遵照十一年諭旨解交內務

府核辦又十三年豐縣報獲太監鄭進祿一名訊有放出爲民執照經臣咨准內務府覆稱鄭進祿經親王府發給印照放出爲民飭令釋放聽其自謀生理又溯查道光五年濟野關盤獲冒戴白頂口稱赴南海進香之內監張來喜一名經前任撫臣奏交刑部治罪各在案是歷年江蘇省遇有太監經過無不拿獲訊供奏明辦理誠如聖諭太監之聲音舉止異於常人地方官認真稽查自不難於盤獲即此等無知之輩脫逃出京或許稱差使妄思恐嚇取財而各官身任地方習知我朝禁令森嚴亦可不致受其愚弄况如臣等受恩深重備員奔奏察宄除奸是其專責更何敢徇及此輩自取愆尤惟有凜遵訓諭嚴飭沿途各文武加意訪查遇有逃走太監即立時鎖拿嚴訊窮追分別有無不法錄供解臣覆訊如並無招搖滋事情弊仍照常辦理如所犯罪名較重即鎖押管解進京斷不敢稍任疎縱以仰副聖主嚴切諄諭之至意抑臣更有請者我朝宮衛整齊約束太監嚴於往代以故若輩性雖貪黷而亦無所施其伎倆不至有營私舞弊之事惟是投充之始本多窮苦無聊其志將以求食也迨供役後差使稍優者得項亦稍裕自可無虞失所其間卽亦有每月支領錢糧祇銀一

兩者日食而外罕更有餘卽衣履往往不周窮極生心妄營意外大率因此而起臣思錢糧有數萬難加增而人數或可酌減如大內供役自有一定差使其餘閒散之處或可酌量稍減逐漸成少卽以酌減之錢糧增當差較苦之項下庶幾人數少可以消雜念衣食足可以長恒心其曾經逃走拿獲之內監除情節較重者應按律究治外其餘卽無重情似亦應分別等差或屏諸遠方或押歸鄉里管束總不使生心向外之人仍得於禁城出入俾前後左右皆以誠謹安詳之人應役不特逃走之弊可革而法立知恩長輦衆志於辰垣矣臣區區螻蟻微忱不能自己謹附片密陳愚昧之見未知當否伏候聖裁謹奏

密陳各員清單

臣陶澍跪奏謹將巡閱所見官聲較優堪勝繁難各員開單密呈聖鑒

計開

安徽阜陽縣知縣加同知銜朱護雲南進士該員清勤幹直立志不苟尤嚴於緝捕足備鳳穎二府將來知府之選

江西南昌府同知現署南安府知府霍樹清陝西進士該員清正廉明夙稱幹

練民情信服悃愾無華年屆六旬精力未衰足勝贛南知府之任

江西贛縣知縣現署寧都州知州周玉衡湖北舉人該員朴直勇敢志在除莠

安良任事能有血性上年引見奉旨以知州陞用足備將來贛州府之選

烏爾恭額

道光八年由貴州貴東道選山西按察使旋調廣東九年召十三年授盛京工部侍郎十四年授浙江巡撫二十年六月革職發往軍臺

効力

片一

再臣承准軍機大臣字寄欽奉上諭嗣後各將軍督撫等務當嚴飭所屬遇有逃走太監立即鎖拿嚴訊確切跟追儻經過地面查有招搖滋事等弊得有確情稟明上司據實入奏除尋常逃犯實無不法情事仍照向例辦理外如所犯罪名較重即著鎖押管解來京沿途地方不得稍爲疎縱經此次嚴切諄諭之後儻再狃於積習一味姑容不肯認真究辦則是封疆大吏竟甘爲若輩小人受過問心能自安乎將來別經發覺朕惟知執法從事重懲不貸凜之慎之等因欽此臣跪誦之下仰見聖訓諄切曷勝悚惕伏思我朝立法太監僅止供奉

內廷不准干預外事如若輩遽來外省其為逃走無疑地方官應即鎖拿無所用其顧慮且太監之聲音面貌迥異常人可一望而知在都市村鎮固有兵役巡緝即窮鄉僻壤亦有地保查察實難掩人耳目臣現在行司通飭各屬文武認真查拿並大張曉諭境內如有太監概准拿送有司究問儻有獲案臣即當提省嚴切跟追不使隱匿遁飾如所犯情重臣一面委員鎖押解京俾無疎脫一面據實奏聞斷不敢稍事寬容以期仰副誥誨諄諄至意謹附片覆奏伏乞聖鑒謹奏

朱士彥字修承江蘇寶應人嘉慶七年進士擢贊善督湖北學政累遷侍讀學士歷少詹事內閣學士道光二年擢兵部侍郎四年督浙江學政九年典會試督安徽學政尋擢左都御史十一年兼管順天府尹典會試調吏部尋六年署吏部尚書十七年調兵部十八年兼管順天府尹典會試調吏部尋卒

片一

再查河庫道一缺總司出入勾稽最為緊要且於發放工程銀兩權衡緩急不致貽誤不獨操守廉潔必須諳練精明方能勝任該道李湘莖實不稱職謹附

片密陳伏祈皇上聖鑒謹奏

鍾

祥道光十二年八月授山東巡撫十五年十月兼署河東河道總督十六年七月授閩浙總督十九年六月革職授四川布政使二十三年七月授河東河道總督二十九年四月卒於官

摺一

閩浙總督臣鍾祥跪奏為遵旨確加體察恭摺手繕據實陳奏仰祈聖鑒事竊臣面奉諭旨飭查江蘇同知姚瑩福建同知瑞光副將葉長春三員是否可備臺灣任使隨經軍機大臣交給名單臣欽遵細加體察謹將該三員才具官聲分晰開列敬為皇上陳之

一查姚瑩一員安徽進士前為閩省知縣現任江蘇監掣同知臣路過江南留心查訪該員升補同知莅任未久不聞短長前在武進縣任內聽斷勤明除莠安良著效官民同稱其前在福建平和龍溪臺灣三縣囑瑪蘭通判各任政績官聲均屬允協輿情感畏不忘凡其舊日同官言及該員才具操守亦均稱道不置并查該員在臺灣時曾有雲霄興化二營班兵偶因細故爭

毆遂訛言兵變半夜倉猝多已張皇戒嚴該員察其非真鎮靜彈壓旋即安定未致弄假成真釀成重案人尤稱之果能始終不渝以此胆識治理臺灣實屬相宜之至

一查瑞光一員滿州進士道光三年分發來閩未及補缺丁憂回旗九年回省補授知縣升福防同知查訪該員才守均好所歷之處官聲孚洽現經引見回閩考言詢事實屬明敏體面之員自到閩省雖未任署臺灣各缺十三年勤完張丙之後委赴臺灣審案亦非辦理軍務其於臺灣懲頑制暴機宜原未試之有素而相其材質似可因地適宜任使加勉應亦不致貽誤

一查葉長春一員由漢軍佐領出身揀補福建參將洊升臺灣協北路副將該員明晰營務任署各缺均稱謹慎并無不妥官聲防堵張丙案內匪犯亦習軍務現協北路足爲臺灣鎮指臂之助惟聞該員熟習事故未能履險如夷趨事恐後即如道光十四年彰化縣匪徒陳長豎旂滋事該員但知稟請總兵勦辦并未先行發兵獲犯人每少之前督臣程祖洛曾亦附片陳明若以獨當臺灣重要之任尙恐未甚相宜

以上奉查三員臣見聞短淺謹就體察所及據實密陳是否有當伏乞皇上聖明鑒裁謹奏

片一

再臣面奉諭旨飭查魏元烜是否勝任相宜烏爾恭額操守一切究竟何如張仙保是否足副任使欽遵之下惟恐知識淺闇兢惕倍深加意詢訪據事考察查得福建巡撫魏元烜心地醇謹見於言貌操守廉慎徵於事實精力強健故能日夕勤勞外任已久故諸務熟諳此皆該撫之所長而其同胞兄弟均蒙特簡封圻圖報亦甚切摯惟該撫謙讓同官平和辦事當此力疲民悍整頓已屬維難而且到閩多年一切駕馭維持之法亦爲人所習見習聞是以竟自阻於因地制宜之效現在臣與該撫盡力共勉期於有嚴有翼設誠圖效均不敢畏難苟安而該撫向來一切辦事情形謹當實陳不敢虛飾又查浙江巡撫烏爾恭額志切報効形於詞色之間才足有爲見諸整飭之事正色率屬輿望交孚卽所管鹽務一切亦俱謹飭循規心不他役該撫精神銳敏言語爽捷而浙省

間有壽張爲幻案件須加細慎靜密方使物無遁情此臣等所應同勉至浙省雖較閩省易治而文武各官疲玩之習亦所不免該撫到任以來率屬務在嚴明習武能勤訓練深合因時爲治之道洵足仰副簡任又查福建副都統張仙保其才具明穩操守亦知慎勉管理旂營均屬妥協操練洵爲認真現在滿兵技藝有進以上奉查緣由是否有當謹手繕片奏密陳聖鑒謹奏

敬

徵

宗室嘉慶十年封輔國公授頭等侍衛兼副都統十九年授內閣學士兼鑾儀使二十二年以失察視職尋予四等侍衛乾隆門行走道光初

累遷工部侍郎內務府大臣調戶部十二年會同陶澍議定淮鹽票引兼行十四年授左都御史權兵部尙書調工部十六年遷工部尙書十八年調戶部二十二年借尙書慶鴻基清勘南河揚河工二十五年以濫保孟保降內閣學士未幾復授工部尙書又坐濫保果勒明阿職三十年署正白旗滿洲副都統咸豐元年卒

摺

一

奴才敬徵跪奏爲詳查太白晝見占條恭摺奏聞事十一月二十一日乙未申初三刻金星晝看申方查是日太陽躔尾宿十一度金星在女宿二度相距四十七度自二十七日至十二月初一日星本下行光體較大申初初刻當午而

見至十五日星漸行躔緯北光亦微縮此後與日度漸近晝當不見恭查占書內載金晝見出東方從卯至午而止西方從酉至午而止不得過午過午則為經天有兵兵止無兵兵起俱以宿占國又曰凡金晝見列宿其所臨之分有兵今查看金星晝見經天宮度係在子亥二宮歷女虛危三宿謹按以宿占國敬繕女虛危分野清單恭呈御覽為此謹奏道光十七年十二月十八日

女分揚州之域

屬浙江 衢州府 紹興府 嚴州府 金華府 寧波府 台州府

屬福建 福州府 泉州府 延平府 汀州府 興化府 邵武府

漳州府 福寧州

屬廣東 廣州府 韶州府 南雄府 惠州府 肇慶府 古越地

高州府 古粵地 雷州府 瓊州府 羅定州

荊州之域

屬廣西 梧州府

屬福建 建寧府

虛危分青州之域

屬山東 青州府 濟南府 登州府 萊州府

摺 二

奴才敬徵跪奏爲恭查星占據實奏聞事閏四月二十八日有流星一箇光芒燭地奴才詢據是日觀象臺值日官塔克什布王朝梅稟稱二十八日亥初後見西北方有流星一箇如核桃大出紫微垣入文昌白色有光有尾蹟即時登入號簿等語奴才伏查占書內載流星大如甕爲發謀事大如桃以下爲使事又曰流星自紫微兩門出者天子使也不從門出者內則后妃諸王外則藩國使也出則使出隨色占之又曰流星出紫宮天子之使也色赤言兵色黃土功色白言義又曰流星入文昌邊臣入朝又曰流貫文昌大臣憂等語謹按此星流入文昌部位併非由紫微兩門出者應占后妃諸王之使其色純白蓋言義也再查是日干支己亥爲戊子旬內占爲中央若論日支分野亥屬幽衛所有奴才詳查占書所載理合恭摺覆奏伏祈聖鑒謹奏硃批「上天仁愛增感增

懼一十八年五月二十三日敬識

摺三

奴才敬啟跪奏爲遵旨查明星象恭摺覆奏仰祈聖鑒事溯查道光十五年八月二十日丙子北斗魁上天理星旁見一異星尾長數寸東南指後漸長至三尺餘共行五十餘度至九月十六日在天市垣中光縮不見奴才面交奏事太監恭遞封奏一件清單一件圖一件其單內開八月二十一日彗星起於北方在開陽之上尾及太乙星占書曰彗出乾天下兵起二十二日彗星在天槍星之上尾指右樞星西占書曰彗犯天槍爲兵饑二十三日彗星犯七公第五星尾指上宰星南占書曰彗星掃七公天子失輔二十五日彗星在貫索之南尾犯天紀第二星占書曰彗犯天紀國相伐二十八日彗星在天市垣中掩衝宦者光及帝座星旁占書曰客星抵帝星旁臣有叛者自三十日至九月十六日均在天市垣中入尾宿度中而沒尾古燕地今之直隸所屬又查道光十七年十一月間太白晝見至十二月下旬不見奴才面交奏事太監恭遞封奏一件

分野清單一件係十一月二十一日乙未金星晝見申方在女宿三度自二十
七日至十二月初一日光體較大申初刻當午而見至十五日後星漸行躡
圍北晝當不見占書內載金晝見東方從卯至午而止西方從酉至午而止不
得過午過午則爲經天有兵兵止無兵兵起俱以宿占國又曰凡金晝見列宿
其所臨之分有兵查看金星晝見經天宮度係在亥子二宮歷女虛危三宿其
分野清單內開女分揚州之域屬浙江衢州府紹興府嚴州府金華府台州府
又屬福建福州府泉州府延平府汀州府興化府邵武府漳州府又屬廣東廣
州府韶州府南雄州惠州府肇慶府高州府古粵地雷州府瓊州府女分荊州
之域屬廣西梧州府虛危分青州之域屬山東青州府濟南府登州府萊州府
今奴才遵旨詳查謹將奏過彗星及太白晝見兵象分野諸占敬謹抄錄恭呈
御覽再奴才現復檢查占書內有太白晝見四海起兵太白經天大臣有殃之
占合併陳明爲此謹奏道光二十一年三月二十三日

摺四

奴才敬徵跪奏爲詳查太白晝見占條恭摺奏聞事自上年十二月初七日至本年閏三月初旬據觀象臺該值官生等按次具稟除雨雪雲陰等日計晝見金星四十三次等語奴才查上年十二月初間金星順行入女宿度中初次晝見是時太陽行躔斗宿度中金星距日四十餘度星體下行光芒較大是以晝見此後星仍順行歷虛宿危宿室宿壁宿奎宿婁宿至閏三月初二日入昴宿六度俱有晝見次數至初六日由昴宿度中退行距日二十九度晝不得見恭查占書行色變異內載太白在春曰囚其色青黃而不明爲常則天下和平當囚時而有旺色其分國有叛將又曰太白晝見有兵兵止無兵兵起各以宿占其國起兵今查初見在女宿度中其分野係浙江寧波府台州府福建福州府泉州府興化府漳州府廣東廣州府高州府瓊州府惠州府又占書曰太白順行入婁是謂子歸其母國有喜石氏曰太白經婁四夷還去今查係順行入婁宿度中晝見四日又占書曰太白逆行守昴天下擾擾多獄事又曰晝見於昴邊兵大起又曰其留守之舍有兵其進舍也是謂趨兵其退舍也兵出不行今查在昴宿度中晝見二次自閏三月初六日留舍逆行推其行度至四月二十

日方見順行昴分冀州之域爲天耳目又爲天器是太白行舍順逆爲兵戎緩急之象謹將奴才詳查占書各條據實敷陳聖明自有洞鑒爲此謹奏道光二十一年閏三月十四日

摺五

奴才敬徵恩桂跪奏爲遵旨查訊事件恭摺奏祈聖鑒事十一月二十六日據景運門值班護軍統領倭什訥封奏事一件奴才等面奉諭旨嚴密訪查當卽密派番役分往各處查拿被揭之王成龍張八即張有功並搜查東華門外六合齋及回回趙五住家去後旋據該番役等將御前水他坦內服役人張八養心殿他坦內服役人王姓三名及東華門外六合齋掌櫃人楊玉得並回回趙五一併拿獲奴才等督飭司員隔別詳訊所有連日訊取供詞情形均經奴才等面奏復向該犯等究詰素日有無嫌隙之人經該犯等供出賣餽大張及伊子張德立素日雖無深恨而均與不睦當派番役在六班下處查傳大張父子以便詳訊據看下處人蘇拉金八十一供大張同張德立於二十七日由下

處搬出已回武清縣原籍等語奴才等查其形踪甚屬可疑即時遴派幹役購線於初一日前往該縣查拿去後旋於初四日酉刻據番役副頭目祥瑞等將大張即泳和伊子張德立拿獲到案奴才等復督飭司員詳加究訊據張泳和供稱係武清縣牛鎮村民年四十五歲前在御前水他坦帶同張德立看屋服役與張八熟識無嫌嗣因王順在回回趙五舖內傭工下來曾邀王順在鳥鎗三處他坦內居住同夥賣過餠餠故與趙五王順素俱識認後因賣餠餠賠本各謀生理王順即搬往養心殿他坦自做生意我即挪在南池子燒餅舖居住並取該舖燒餅及六合齋舖蘇花等項餠餠背進紫禁城內零賣故與楊玉得彼此熟識我挪出時託素識之看六班下處蘇拉金八將張德立安在該下處居住亦在禁城內賣餠餠上月二十六日下午因聽說西長河各他坦拿了許多賣餠餠之人我心裏害怕於二十七日將張德立帶出在南池子燒餅舖住了一夜於二十八日清早即回原籍家去並無別故等語詰以聽說查拿賣餠餠之人係因何故據供傳言爲偷放爆竹粘貼無名帖字之故當即究詰伊聽何人傳說而該犯言語惘惘竟不肯指出傳言之人復提張德立研訊據供年

十六歲於十九年跟伊父張泳和來京在御前水他坦服役閑時念書學字其餘所供與張泳和大略相同當將由該下處查獲之賬目摺子一個令其認看卽據供認是伊所寫復令伊自寫口供二張查看筆跡間有與帖內之字甚屬相似惟伊父子供詞現訊尙無破綻又無質證未便因字跡相似卽嚴刑審訊惟所揭之事關繫重大前經奴才等親往查驗毫無實據自係因挾嫌陷害起見必應澈底根究以期水落石出奴才等除督飭司員設法研鞫外謹將拿獲張姓父子到案查訊大概情形理合恭摺先行奏聞謹奏道光二十二年十二月初六日

摺 六

奴才敬徵跪奏爲近有天象先行奏聞事本月初九日據觀象臺值日官忠福黃德泉報稱初七月初八日酉正二刻至戌初二刻西南方見白氣一道長二丈餘寬約尺餘往西行方散等語奴才於初九日初十日晚間觀候較前增長其氣日入地平後漸露微帶紅色至酉正三刻其色純白長約十餘丈中寬尺

餘兩頭漸細下起西南上指正東偏南而不見星象隨天西行入地平方沒查此氣在赤道迤南其尾是否貫日在地平下不能見其光在天倉中貫天苑指九旂奴才現在詳查占書考核名目併密飭天文科派員逐晚觀候呈報先將連日查看情形恭摺陳奏伏祈聖鑒謹奏道光二十三年二月十二日

摺七

奴才敬徵跪奏爲敬查天象占條恭摺奏聞事二月初旬西南方日入後見有白氣一道奴才據觀象臺所稟併查看情形於二月十二日奏蒙聖鑒在案復特派五官正閻信芳主簿杜熙齡督同天文科官生逐日輪班考測奴才同監正監副等亦詳細觀候茲據該員等稟稱候得此氣係自二月初五日始見白跡因月臨其上不甚真切初七日形跡稍真即自初十日起記其起止自地平塵氣之上貫天倉天苑末在九旂十一日至十九日氣漸東行白光真切中寬尺餘兩端皆銳二十日戌初後其兩端光中掩天苑第五星四星三星貫九旂掩軍井四星末指厠星北增星以遠光鏡視之始見西端有小星色微赤星體

大小類五等星以平地經緯度考測西端在正南偏西六十三度高於地平十三度餘東末正南偏西十三度高於地平三十三度餘以赤道經緯計之西端在酉宮十三度緯南十度東末在申宮二十六度緯南十三度歷赤道經度一宮十三度應奎婁分野至二十八日光漸微細掩九州殊口第二星第五星玉井第一星衝參宿第六星三月初二日其端小星甚微餘氣尙衝參宿第七星初三四日雲陰初五日晚晴其氣不見等語查該官生考測情形與奴才逐日所見相符惟此氣初不見其端未審有無星象至二月二十日高出平地十三度用遠光鏡始見其端有小星自係距太陽度遠方得微露其跡而其光長亦至十數丈兩端皆銳形似鋒矛見至一月自非氣類恭查欽定天文正義占書內載孛彗長三星其占略同而其形少異孛星芒短其光四出蓬蓬孛孛然彗星光芒長參之如掃帚然長星光芒有一直或竟天或十丈或三十丈大率孛彗爲除舊布新火災長星爲兵革事又曰天槍出西南長數丈左右銳赤色見則枯骨藉藉又妖星內載天鋒彗象矛鋒天下縱橫則天鋒星見觀象玩占曰天鋒出必有亂臣戮死於下奴才考覈占書謹按此氣本既見星尾長至十餘

丈類似長星又兼天槍天鋒之象多主兵革之事其初見在天倉中占書曰兵大起粟出民飢其分野在奎婁度中應徐州等處占書爲大水其行度總在赤道之南海中占曰邊失地有爭國者謹將其光芒所犯列舍占條另繕清單併繪圖恭呈御覽再奴才查道光六年七月二十九日畢宿度中見一異星尾漸長至八九尺南行四十餘日歷畢昴胃婁奎五宿分野其星亦在赤道南亦掩天苑芻藁犯天倉後於道光八年應回疆復定之事合併陳明伏祈聖明洞鑒謹奏道光二十三年三月初八日

天倉六星主倉庫之藏占書曰彗出天倉兵大起粟出民饑若犯守之國無儲糧

芻藁六星主積草供牛馬之食占書曰彗孛犯芻藁牛馬暴死災起

天苑十六星爲天子畜牧之苑金官也占書曰彗犯天苑爲兵獸多死觀象玩

占曰彗犯天苑都護反

九旂九星一曰天旗主導軍進退占書曰客星犯九旂諸侯兵起禽獸多死

九州殊口六星主聚議曉方俗之官通重譯者也占書曰客星犯九州殊口民

憂水負海之國不安有兵

參宿七星主斬刈萬物金星占書曰彗星貫之主兵此氣貫其第六星第七星
占爲後將軍徧將軍有憂

玉井四星主水泉水官也占書曰彗犯玉井河海溢

軍井四星主給師濟疲乏占書曰客星犯軍井憂水害

西端小星每日東北行度數無定計自赤道經度戌宮十三度至酉二十九度
共歷行赤經四十六度係自奎宿一度至昴宿四度查分野諸書皆以二十八
宿爲衡未分赤道南北此星歷奎婁胃昴四宿分野係在其度中其光並未及
本宿謹錄其分野恭呈御覽

奎婁分徐兗二州之域屬壽州泗州潁州府亳州宿州廬州府徐州屬山東兗
州府

胃昴分冀州之域屬正定府順德府廣平府屬山西大同府蒲州

顏伯燾字魯與廣東連平人嘉慶十九年進士道光二年出爲陝西延榆綏道
歷陝西按察使甘肅直隸布政使十七年授雲南巡撫二十年擢閩浙

顏伯燾

史料旬刊

總督二十二年
罷成豐三年卒

摺一

雲南巡撫臣顏伯燾跪奏爲密陳司道知府考語仰祈聖鑒事竊查定例司道知府賢否應於年底出具考語密陳一次各任歷經遵辦在案伏思臣一介書生仰蒙我皇上特達之知由編修洊擢巡撫恩施無已感懼交并受事以來兢兢以整飭吏治爲務欲飭吏治必先察吏欲察羣吏必先大吏蓋大吏得人則奉公守法盡心爲國爲民者羣吏必爭自濯磨人材即可蔚起臣去年九月到任扣至年底已逾三月每於屬吏晉謁公牘上申隨時隨事聽其言論覘其才識驗其行爲臣不敢自謂知人然朦混掩飾遷就瞻徇臣亦斷斷不敢出此詳慎核實就臣所見及者敬謹註考繕單恭呈御覽查司道中藩司伍長華鹽道王贈芳最爲才守兼優迤南道胡啓榮坐守邊陲諸能了事其人有體有用惜已遲暮知府中則雲南府黃士瀛永昌府周樹均堪任使此外實缺候補應行澄汰者殊不乏人容當據實按事參劾俾各知所勸誠不敢僅託空言虛應故套其目下可備道府之選者惟威遠同知耿麟昆明縣知縣宮慕久兩人而已

質之督臣伊里布意見相同臣自愧庸愚忝膺封圻重寄然以人事君之義亦不敢不自勉理合恭摺密陳伏乞皇上聖鑒訓示謹奏道光十八年正月十三日

片一

再臣上年十二月十六日接奉恭報到任一摺硃批諸事勉力毋忘面諭以副朕望毋忽欽此跪誦迴環莫名感悚竊念臣受恩高厚擢守封圻任事以來服膺聖訓矢諸寤寐伏查雲南地居邊要錯處漢夷計各州縣幅員輒數百里千里之大山高地瘠非不可勸懇荒蕪而舟車不通懋遷無術坐是閭閻困乏生計維艱豐稔之年田穀猶堪足食一遇荒歉即苦無所蓋藏又兼生齒日繁游民外來益衆加以遺犯增集風氣澆漓訟獄煩興實原於此幸猶知官畏法治之以嚴則帖然安堵第民貧既一無可恃官貧又有不能爲欲爲民計不得不先爲官計必官能自顧然後可望官之顧民也自浙閩督臣鍾祥於任雲南藩司時籌款津貼州縣吏治稍有起色惜在任不久措置尙未周詳臣擬師其意

而推廣之俾官得以舉動自由則實以教養斯民既不致藉口畏事復不致掣肘從公偷有不肖則嚴加糾懲吏治蒸蒸日上安見瘠土之不爲樂土近來開化臨安一帶夷地連年歉薄先則偷竊繼則搶奪甚至拒捕殺人臣愚以夷人桀黠少事寬容必致養癰貽患督臣伊里布自黔旋省臣卽與熟商遴選員弁專司其事率同該地方官四面搜捕期於本月內外獲犯重辦一律肅清此後長治久安之策再與各州縣逐一講求但能盡一分心則百姓受一分福卽未能驟臻上理亦可馴致小康此臣之有願未逮者也至銅政鹽法則伍長華王贈芳所辦井井有條調劑得宜因時損益採運煎銷已有明效大驗其腹地夷種極多嚮化旣久已與漢人無異治之稍嚴於漢人卽可悉就安謐至外域邊防則守邊文武不啓邊衅不貪邊功又了邊事數年卽加獎拔否則立予嚴參滇省已十餘年無邊患乃從來所未有此則督臣伊里布之卓識定力而文武員弁亦奉令惟謹守此不渝決不致有他慮省標兵丁技藝頗爲可觀鎗箭中靶竟在八成以上臣所携抬鎗省城六營各已照製十桿練習純熟便可增添得力臣知識庸陋重任忝膺惟有殫盡血忱凜遵面諭事事總求認真務實持

之以恒行之以漸尤不敢稍露鋒銜致招嫉忌有辜期望上負生成所喜督臣
伊里布醇正忠誠可師可法司道亦皆同心協力甚屬和衷至知府以下優劣
頗殊臣亦祇秉公隨時舉措以示懲勸以冀得人因遠蒙恩諭合併密陳無任
感戀悚惶之至謹奏

片二

再臣籍隸廣東連平州初次回籍在嘉慶九年彼時連平州吸烟者不過數人
已爲指摘所歸二十一年臣復回籍則連平州吸烟者多至數十人然猶掩藏
甚密迨道光十三年臣又回籍則連平州吸烟者竟不可以數計吸者固不避
人見者亦恬不爲怪尤可異者貧民賤役餬口維艱可以日不再食而烟則在
所必吸若執袴子弟有力之家染此惡習者更不必問其始地方官非不嚴拿
究辦繼以究不勝究與其徒飽書差之訛索增地方之滋擾則莫若因循聽之
尙得相安於無事此亦無可如何之苦衷也夫連平在廣東僅一州之地耳偏
僻小邑土瘠民貧而相習成風至於此極其他通都大郡紳衿之所輻輳商賈

之所往來者臣雖未歷其地要亦不難懸揣然則連平如此廣東一省可知即他省亦無不可知是固非一朝一夕之故亦非一州一縣之故矣夫五刑之有大辟所以懲民之大奸大惡也吸煙者原爲人心風俗之弊然不過不自愛其身家不自惜其性命初非姦盜兇鬪侵損於人有犯者照常例治之法與罪已足相蔽如該寺卿所奏立限一年之後不斷癮者皆置大辟直與大奸大惡同一科斷在律設大法犯禁者本屬無可憫憐而例準人情勅罰者豈可漫無區別且例載大奸大惡殲厥渠魁之外尙有權其輕重以次遞減之條今吸煙者但犯此禁即罪無差等亦無此用刑之典況我盛朝列聖二百餘年政崇寬大好生之德久治民心我皇上御極以來厚澤深仁華夷廣被豈宜忽有此舉臣竊以爲該寺卿所奏不惟有紊刑章抑且不知政體矣且此非特不可行亦必不能行也吸煙者如此其衆立限一年之後能必其無不斷癮耶持平論之斷者半不斷者半此不斷癮者又豈能盡拿之耶約略計之不能拿者半拿者半今即以得半而論一省所拿至少亦有數百人合之各直省所拿則已有萬餘人執此萬餘人一概棄市非常之舉勢有難行及至難行乃始收回前令另作

變通是前令已爲虛設而此後之吸烟者心有所恃必益肆無忌憚所謂任法者法有時而窮也不但此也人孰無父母妻子一家之中一人犯法如果情眞罪當其父母妻子知爲法所難容雖痛切至親亦甘心而無他說若吸烟者置之大辟擬罪豈可謂當即使人人服法俯首就戮而人人之父母妻子念及前此吸烟者未嘗蒙此顯誅今一旦新法創行適罹其禍人各有情誰能隱忍輕則謗讟沸騰重則激成事變亦爲勢所必至况一年限滿不斷癮者其親屬斷無自行舉發仍不得不假手官吏人數過多搜求過急彼人人之父母妻子知其被拿之後萬無生理勢衆言龐互相煽發既不忍於坐視勢必出於抗爭一閔之市即查拿而亦不聽焉又將何以爲計耶所謂必不能行者此也雖然該寺卿之設爲此議爲塞漏卮以足國用起見耳臣雖至愚安敢謂漏卮不須塞國用不須足然謂用之不足徒在禁煙煙禁而漏卮即塞則殊非定論伏考史冊三代以下迄於元明方其開國無不物力豐盈及其中葉無不少形支絀所以然者開國之初法制未備度支尙簡迨數傳而後所入仍不加多而生齒日以繁興作日以盛或時逢旱澇而租稅無徵或偶值師興而轉輸甚劇準所入

以計所出其始有餘而繼不足似亦同然之勢顯而易見我朝幅員之廣超越前代如雲南貴州等省地薄糧少每年藩庫所出皆賴他省撥解始敷支用又自開辟新疆至今已將百年臣曾任甘肅布政使嘗總計內地銀兩出關供口外各城廉餉以及官民公私等項每歲不下四五百萬乃商賈營運入關者每歲不過二百萬卽此以觀則漏卮已不止如該寺卿所論況此外尙有臣所不能周知者區區一鴉片而謂國計之盈虛必在於是是尙未通盤籌計也臣愚以爲求所以足用之道惟在各臣工仰體皇上裕國裕民至意實心任事矢以和衷於弊端之積者極力剔除於舊章之善者多方整頓有虧之項則亟議補苴毋執空言可省之費則隨時撙節毋使虛糜督撫表率司道司道戒飭所屬官無大小罔不同心事無巨細罔不留意雖未必於會計遽有所增而行之既久終可以得理財之實效至於民俗之浮靡有妨國用亦在地方官善爲禁制而潛與陶融苟能治理勤求風俗自能移易閭閻自可殷實有吸煙者亦無大損若徒以嚴刑峻法求富國而足民如該寺卿所議無論其效難期卽令辦有成效亦覺事有不宜名有不順記曰刑罰中故庶民安庶民安故財用足蓋自

古惟聞養民教民以足民從未聞刑民而以富國者也至該寺卿奏稱販賣鴉片之多由於吸食之衆無吸食者自無興販者臣則謂必須無興販者然後無吸食者而利之所在趨之若鶩興販之來不能杜絕該寺卿已反覆言之迄無善策又所稱外夷用法甚嚴故夷民不敢犯吸煙之禁臣不知該寺卿果有確據抑係得之傳聞如竟係傳聞則臣之所聞者有謂夷人無不吸煙惟外夷能以秘藥濟之不惟無損轉復有益與中國之蘊尤同功是傳聞業已異詞奚足爲信且煌煌天朝豈有倣行夷制之理又所稱因販煙而銀出外夷逐年增至三千餘萬銀之出洋固所不免然其數安得如許之多又安得如此之確恐亦傳聞已甚臣受恩高厚職任封圻何敢效畏事之人不肯爲國任怨稍有托辭至爲該寺卿所料但事理情形似係如此既有所見不敢緘默不言既屬因公理合統具正摺惟其中備言禁止鴉片之難竊恐宣布中外俾吸者聞之共有倖心轉相玩法殊於國體有礙是以不揣冒昧附片密陳以昭慎重而免彰揚伏乞皇上聖鑒謹奏

周天爵 字敬修 山東阿人 嘉慶十六年進士 廬州知府 授安徽懷遠縣知縣

魁無漏網 熱刑痛懲 十五年擢江西北河總督 仍授安徽巡撫 陝西布政使 十七年署漕運總督 實授十五年擢江西按察使 仍授河南巡撫 閩浙總督

皆未行 調授湖廣總督 二十年言官劾天爵 濬刑 職成 伊黎 二十一年赴

品頂戴 署漕運總督 兼署南河總督 二十三年因濫刑及失察 命以二品頂戴 休致 三十年起廣西巡撫 欽差大臣 李星沅 辦軍務 加總督銜 旋擬去

命天爵 署安徽巡撫 旋辭巡撫 任專任兵事 以疾卒於軍

片一

再臣抵楚以來 留心訪查 紀昌期平日勤儉 自持操守 尙好其子 紀鎬亦無劣跡 惟任秉鈞之子 任作霖 雖無案據 實非安分之徒 紀昌期在襄陽任內 以民情強悍 盜賊滋多 遂欲糾之以猛 致有焚屋重責之事 其心為整飭地方起見 尙係該參員好處 現據檢查各卷 其獲辦本省隣省命盜 斬絞軍流 徒各案人犯 二百二十一名 地方頗有起色 民情亦甚愛戴 惟去年時當喪子 精神頓形昏憤 以致蠹役 朱元幅等 詐贓勒贖 未能查出 歐陽峻 被誣任性 濫責甚至屬員 擅受釀命 徇情諱飾 種種荒謬 不得不從重定擬 惟念該員緝捕克勤 尙能整飭地方 恐不知者 因其已獲嚴譴 或生疑懼 長人因循 懦弱不肯竭力任事

之心可否仰乞逾格鴻施寬免遠戍出自皇上天恩臣不揣冒昧據實陳請不勝悚惶之至謹奏

牛鑑字鏡堂甘肅武威人嘉慶十九年進士遷御史給事中道光十一年出

授江蘇布政使十九年擢河南巡撫二十一年河決祥符水圍省城鑑言省

城可守不可遷決口可堵不可漫興工塞決六十餘日而完會裕謙死於浙

命鑑代署兩江總督尋實授十月至蘇視事二十二年英兵窺吳淞口提督

陳化成戰死鑑退保江甯會同耆英伊里布與英人議和尋被職遠問二十

四年釋之赴河南河工効力咸豐三年署河南按察使四年免

片一

再臣未到河南時即知河南有候補知府方觀國秦伯度二員聲名不佳及至

到任後留心訪察方觀國捐納知縣加捐知府簽掣河南候補歷署衛輝陳州

南陽各府印務該員貌似有才心地欠純此次被參各款如索取規禮一節雖訊無確據惟此等曖昧之事受者既不肯吐實與者又何能顯然承認至所參私債纍纍現在本省即有被控之案可知人言非出無因又秦伯度廣西進士即用知縣分發河南加捐知府歷署汝寧懷慶河南陳州南陽彰德歸德各府

印務操守平常人人指目臣查該二員在豫年久素稱能幹而歷署府篆營私取巧物議沸騰詢之輿論衆口如一雖不能指實其劣跡將來得缺決非妥協可用之員理合附片密陳再查方觀國現在據報丁憂合并聲明伏祈皇上聖鑒謹奏

怡良歷官年月見第三十五期三〇三頁

片一

再臣怡良前於四月中瞻覲天顏召對之次仰蒙聖諭廣州府知府珠爾杭阿辦事如何是否能勝首府之任令臣怡良到任後與督臣鄧廷楨商酌察看欽此臣於行抵粵境後沿途訪察僉稱該府人甚正派操守廉潔迨臣到任以來不時接見詢以公事應對亦均明晰遵與臣鄧廷楨商酌臣鄧廷楨查該府於道光十五年經前撫臣祁墳奏調廣州府知府該府初到首郡時情形尙未周知是以辦事稍覺拘謹近年公事漸熟並經臣等隨時指引該府頗能奮勉從公膽識亦漸開拓現經委審私開窯口與販鴉片及提省要案均臻穩練可勝

首府之任相應據實附片密奏伏乞聖鑒謹奏

周春祺

給事中內閣侍讀道光二十三年銀庫虧空案以主事用

摺一

吏科給事中臣周春祺跪奏為聖恩寬大再敢竭誠密奏事竊臣前奏浙江提臣祝廷彪不足為將士表率仰荷聖明以衰庸罷黜凡在臣下莫不感悚臣查暎夷滋事釁先粵東該省前後督臣雖經褫職皇上仍令赴省聽候查詢差遣蓋亦因其辦事認真才具尙有可用未忍以一眚遽棄也然臣謂令外臣差遣或存形跡之嫌不加驅策轉得置身事外現在夷情叵測明年春融後不能保其不四出游奕畿輔重地尤宜妥為豫備督臣琦善熟悉畿輔情形前次辦理已有成效可否出自天恩令琦善仍回直隸總督之任必能益臻妥善至林則徐等蒙皇上特予嚴譴本因其辦理夷務時逾兩年致令該夷赴近畿呈訴冤抑非因粵閩等省堵禦不力也臣竊聞自南來者僉謂林則徐在粵防堵極為周密古人云使功不如使過林則徐已蒙逾格鴻慈仍得差遣聽用若再荷蒙

矜宥假以尺寸之柄獨當一面令其帶罪圖功俾得專精思慮臣雖至愚知林則徐必當捐糜圖報於萬一我皇上知人善任進退自有權衡小臣何敢妄參末議惟欣逢聖主赦過用人之際既有芻蕘之見不敢不冒昧密陳伏祈聖鑒謹奏道光二十年十二月十七日

吳文鎔

字甄甫江蘇儀徵人嘉慶二十四年進士六選為翰林院侍讀學士督

順天學政署禮部侍郎調刑部兼署戶部道光十九年出為福建巡撫撫三十年調湖北未行暫護閩浙總督明年改江西巡撫二十八年調浙江巡撫三十年擢雲貴總督咸豐二年調閩浙未行三年春雲南永昌回民蠢動文鎔親駐尋甸督勦尋調湖廣總督四年正月督師進黃州大雪太平軍大至文鎔力戰兵潰投塘水死

片一

再臣自上年籌防海口以來時以得人為急於水陸各營將領中隨事體察留心物色求其才識俱好足膺專闖者未易多得謹就臣所深知者數員據實密陳以備皇上採擇焉

金門鎮總兵竇振彪 勇往公正能馭兵尤能愛民上年七月間眾紳耆自練

壯勇九千名呈該總兵點驗聽其指揮號令至今不懈以武員而輿情愛戴如

此殊爲難得

海壇鎮總兵吳建勳 馭兵嚴整處事精詳一切籌防布置均能不動聲色悉合機宜是有勇而兼能有謀者

延平協副將靈德 有胆有識習苦耐勞自上年七月間調赴廈門統帶各營防兵均能約束整齊士心悅服臨敵尤能奮往直前身先士卒洵屬任重之才陸路提標前營遊擊武攀鳳 勇幹有爲善於馭士覘其器局殊有大將之風水師南澳左營遊擊陳勝元 果敢樸實遇事向前絕無營中虛僑習氣是亦不甘小就者

摺一

江西巡撫臣吳文鎔跪奏爲學政任滿循例具奏仰祈聖鑒事竊照學政任滿例應督撫將其在任考試聲名辦事若何據實具奏茲查江西學政臣孫瑞珍自道光二十三年二月到任所有延請幕友名數並二十三二十四二十五等年考試情形均經臣年終具奏在案本年續考瑞州臨江南康九江饒州廣信

等府回省即辦理錄遺事務現已完竣臣留心體察復於接見各屬時面加諮
詢該學政持躬端謹衡校公明士心翕服其歷試各屬一切察弊防奸尤能精
細周詳不遺餘力聲名頗好理合據實恭摺具奏伏乞皇上聖鑒謹奏道光二
十六年八月初五日

祁寯藻

字春圃山西壽陽人嘉慶十九年進士道光元年直南書房督湖南學
政累遷庶子十一年遷侍講學士歷通政司副使光祿寺卿內閣學士

十六年授兵部侍郎督江蘇學政歷戶部吏部侍郎留學政任十九年擢左
都御史兵部尚書二十一年調戶部命為軍機大臣二十九年以戶部尚書
協辦大學士文宗即位拜體仁閣大學士仍管戶部寯藻自道光論洋務
與穆彰阿不合至是文宗罷穆彰阿寯藻遂領樞務咸豐元年調管工部二
年復調戶部四年致仕十一年穆宗即位特詔起用授禮部尚
書穆宗入學備翁心存倭仁李鴻藻同授讀同治三年致仕

摺一

戶部尚書臣祁寯藻跪奏為謹將議駁開採事宜再抒管見仰祈聖鑒事竊惟
國家立一法行一政必揆度時勢斟酌利弊有利而無弊上也其次利多而弊
少得人猶可行也若弊多利少且利未及興弊已立見覈之時勢既非所宜倘
不得人更貽後慮則與其禁於已然之後不如禁於未然之先如御史福珠隆

阿所奏增開礦廠一條臣部現經遵旨會議具奏茲更就管見所及析言其弊敬爲皇上陳之伏查礦稅之弊前明最甚資治通鑑綱目三編內載正統九年成化十年萬歷二十四年先後開採各省金銀礦場伏讀御批於前代致弊之由申論再三昭垂鑑戒皇上勵精圖治執兩用中凡臣下條奏事宜無不權衡至當道光六年大興縣民陸有章等呈請開採由部臣具奏奉旨斥駁宸衷獨斷洞徹弊源杜漸防微意至深遠今該御史因海疆需費之際復以增開礦廠爲言殆未嘗深思而熟計之也開廠之初先尋礦脈胥吏藉端四出以躡訪爲名廬墓田園勒履幾徧詐取橫索鄉里騷然是礦廠未開而病民已甚其不可行者一也工作方興募夫雲集凡設立山場之州縣其爭睹盜竊之案必多納隱藏奸幾同淵藪始則負強陵弱繼則倚衆抗官擾累地方釀成巨案是礦廠既開流弊日甚其不可行者二也礦砂盈縮靡常砂盡即應封閉仰給之衆驟無所歸於是散而爲竊聚而爲匪是既經開採即封閉猶有餘患其不可行者三也近畿地面固應封禁卽距京稍遠南北各省均屬四達之區防範稽查亦非易事邊省若雲貴川廣或毗連夷界或近接苗疆舊廠已費周防新增尤宜

慎重是無論鄰近邊遠皆多窒礙其不可行者四也據該御史奏稱各省礦廠向皆安靜意欲援此爲例不知其安靜之由正以礦廠稀少章程久定若驟開新場搜採紛紜豈能相安無事又稱出示曉諭定以募夫限制由地方官隨時查減不知無業之徒惟利是務聞募則相率鬻至減之則別生事端豈曉諭所能禁止又稱專定嚴律儻敢糾衆逞兇拒捕傷人者准弁兵開槍擊斃夫因開礦而調集多兵已覺駭人聞見且應募者率多無賴豈肯束手待斃是欲弭事而適以滋事尤屬無此辦法至所稱請由各督撫細查境內有金銀礦山若干座妥議開採彈壓章程并擬優叙升階以期踴躍等語該御史但慮州縣推諉臣之所慮轉恐州縣逢迎蓋督撫不能不責之州縣州縣又不能不屬之胥役一經查勘則州縣揣知上司意在欲行胥役揣知本官急於求效罔上營私何所不至是則利未及興而弊已立見者也臣愚竊謂天地有自然之利而開閉貴因乎其時國用即有不得已之時而亦有斷不可行之事礦廠在國初初置以有餘之力取無盡之藏縱使所費多而所獲少亦藏富於民之至計今則功期速效事屬急需所獲尙界渺茫所費已極浩大即以現在雲貴川廣礦廠而

論每歲所入不過四萬餘兩今即再增歲額亦復何濟目前徒使丁役偷漏奸商隱匿官吏侵漁閭閻騷擾財耗於下法敝於上甚非計也臣再四思維開採一事實屬有害無利應請永遠禁止不准議行以杜弊源而清治本除該御史所奏臣業經會同議駁外謹再就管見所及繕摺瀝陳是否有當伏乞皇上聖鑒訓示謹奏道光二十一年五月初九日

布彥泰

滿洲正黃旗人由廕生授藍翎侍衛游升二等侍衛嘉慶二十三年充伊犁領隊大臣烏什辦事大臣

伊寧辦事大臣烏什辦事大臣九年授喀什噶爾總兵十年充哈密辦事大臣

病歸十八年授察哈爾都統二十年擢伊犁將軍二十三年陞塔什圖畢

阿齊烏蘇等處開墾事宜時林則徐在戍所布彥泰於舉事一以諮之得地

二十萬畝又奏留全慶借林則徐周勒南路阿克蘇烏什和闐得田六十餘

萬畝二十五年授陝甘總督二十六年抵任二十九年以病罷尋坐失察議

降調子二侍衛充葉爾羌幫辦大臣調伊犁參贊大臣

臣偕將軍奕山會議俄羅斯通商事宜咸豐四年回京

清軍一按清單一及清單二道光硃書布彥泰及二十一年等字

謹將伊犁領隊大臣及總兵等密考清單敬呈御覽

伊犁參贊大臣璧昌甫經到任

巴燕岱領隊大臣珠勒格善明白勇敢管轄頗能細心認真

錫伯營領隊大臣常清甫經到任

索倫營領隊大臣德克吉春人謹飭循分供職

察哈爾營領隊大臣開明阿勇敢有為勤學好問粗通清漢文義

額魯特營領隊大臣花沙布老成歷練通曉清漢文

屯鎮總兵福珠洪阿安詳謹慎盡心營屯

清軍二

謹將統轄各路都統大臣及提督總兵等密考清單敬呈御覽

東路各城

烏魯木齊都統惠吉老成詳慎辦理妥協

烏魯木齊提督中福熟諳營務操屯認真

烏魯木齊領隊大臣穆特恩甫經到任

哈密辦事大臣德全謹飭安詳而不免疲軟

吐魯番領隊大臣額勒金泰循分供職

巴里坤領隊大臣阿精阿年逾六十兩耳重聽

巴里坤總兵慶昌老成歷練曉暢營伍

古城領隊大臣全慶小心謹慎一循舊章

庫爾喀喇烏蘇領隊大臣佛麟循分供職

哈密協辦大臣恒毓尙未到任

南路各城

葉爾羌參贊大臣圖明額在協辦任內妥協而不掣肘茲陞任參贊大臣未

久其能否措施得當容奴才再行詳加查看

葉爾羌協辦大臣富興阿辯給便捷利心重而眼界不大

阿克蘇辦事大臣常恒甫經到任

烏什辦事大臣瑞元尙未到任

烏什協辦大臣法福哩人謹慎前在伊犁摺房行走多年清文長

庫車辦事大臣多歡喜事見長性情躁妄喜事而不曉事見長而無所長道

路口碑有鬧事大臣之稱

喀喇沙爾辦事大臣聯順倨傲自負辦事款精詳周到

和闐辦事大臣達明阿雖眼界不大尙爲安分

喀什噶爾辦事領隊大臣華山泰尙未到任且係奴才堂弟例應迴避應聽

葉爾羌參贊大臣考核

喀什噶爾換防總兵珠克登尙未到任

英吉沙爾領隊大臣塔們布人老成通曉夷情

北路一處

塔爾巴哈台參贊大臣湍多布前於道光十二年巡查布魯特邊界遁逃後

久爲夷衆輕視塔爾巴哈台所屬卡倫與伊犁毘連難免外夷輕視且換

防塔爾巴哈台係伊犁烏魯木齊兩處滿洲官兵伊犁官兵與湍多布多

係親故該大臣不能公而忘私則兩營不免岐視似乎人地不宜查湍多

布通曉蒙古語於烏里雅蘇台庫倫距西夷相遠之處尙屬相宜

塔爾巴哈台領隊大臣伊勒東阿小心謹慎循分供職

塔爾巴哈台領隊大臣朝善循心供職

片一

再查回子貪利求榮之念倍甚常人故雖父子之間似亦不如其身受之爲遂
意夷性大率如此茲蒙飭查哈里雜特有子幾人係何品職仰見聖心曲加撫
馭逾格鴻恩該伯克聞命之下伏地碰頭歡感不已惟此次開墾阿奇烏蘇地
畝渠長工大較之三顆樹阿勒卜斯工程加多數倍該伯克哈里雜特前於三
顆樹工竣案內未曾身沐天恩此次尤爲認真出力是以奏請獎其微勞茲若
蒙恩加賞其子品職該台吉固已頂感歡欣然在衆小回子之愚見不免以爲
該伯克連次開墾出力而未身受天恩轉似向隅則未足以昭激勸向聞回性
之爲榮耀者莫過於乾清門而此等恩施非臣下之所敢請第奴才略知回性
亦不敢默而不言不揣冒昧手繕密陳伏乞聖鑒謹奏

片二

再查道光十二年前任伊犁將軍玉麟奏派領隊大臣湍多布西嚶阿帶兵八百名往查吹塔拉斯出卡數站扎營後該領隊等見營外觀看之布魯特人數較多疑爲有變遂二人乘馬突然先遁時已日落衆兵見大人單騎逃跑無暇備馬以至步行奔竄所有抬砲二十位軍械鍋帳等項及馬駝什物概行摺棄至次年貿易來城之夷人聲稱去年大人們查邊不知因何無故逃跑摺下馬駝物件都便宜我們布魯特衆人白得去了該領隊等顧影生畏遁逃苟免損威招辱啓外夷輕視之端實由於此彼時若從實參辦則夷衆聞知天朝法嚴令肅自可杜其覬覦之心乃玉麟袒護湍多布等僅以被水冲失粉飾參奏交部議處雖予以降級處分又以現任新疆之例俟回京後始行查辦該領隊等獲此重咎而毫無譴責兵民咸爲詫異查湍多布之爲人心地險巧行止卑鄙工於逢迎無所不致歷任將軍無不視爲能員倚爲手足特依順保等與之尤稱水乳是以保舉之摺未經拜發而此地已有湍參贊之稱此湍多布等畏葸遁逃致啓外夷輕視之由來也迨特依順保任事後遇有外夷入卡偷竊牲畜之事不思設法緝拿先將該卡官兵奏參責革枷號仍着落賠補雖係罪有應

得不能不從嚴懲治而各卡官兵相率生畏與其責革後仍須賠補莫若暗行賠補可免責革因將越卡偷盜之案間或隱匿不報而無知夷匪遂以爲官兵無復來追轉得有以自逞其梗頑藐法之漸實由於此於是數年來偷劫之風日甚一日逞兇拒捕之事不一而足至於附近邊界諸夷每當秋冬之時就食水草入卡偷牧者亦復不少本應隨時驅逐無如因循日久習爲故常此時若加以驅逐該夷等散處於深山僻壤之間非多派官兵難於從事誠恐一有舉動該夷等勢必羣相驚擾愈不足以昭慎重湍多布等萌患於前特依順保養雍於後數年之間卡內卡外情勢已積重難返非示以兵威大加懲創不足以儆頑夷但必因此犬羊醜類勞我師干糜我帑項不惟國家體制不能如此率意興戎即奴才受恩深重亦斷不敢輕舉妄動喜事邀功致煩聖慮是以前任將軍奕山悉心集議正於添設巡查不能別有良圖奴才惟有竭盡血誠慎之又慎使巡查密而勿致其驚防備嚴而不患其擾從容鎮靜隨時相機酌核辦理以期仰副諄諄誥誥誠至意第奴才賦性庸愚誠恐識見稍有不周所關匪細凜惕滋深伊犁參贊大臣有協辦之責若任得其人則治有其法新任察哈

爾都統璧昌老成歷練詳慎精明任怨任勞見識遠到歷任新疆十餘年洞悉夷情措施得當且曾出師滑縣經戎行可否仰懇天恩將璧昌授爲伊犁參贊大臣奴才素知其世受國恩不忘忠愛必能盡心公事奴才遇事得有商酌於邊防要務益臻妥善奴才爲邊疆緊要起見不揣冒昧謹附片密陳伏乞聖鑒奴才因目力不及是以繕寫未能端楷合并聲明謹密奏

片三

再此次開墾阿齊烏蘇荒地一切應辦工程俱係捐資人員分段承修龍口首段係原任兩廣總督林則徐承修查龍口地勢北岸係碎石陡坡高二三丈至八九丈不等水傍坡流須創挖石坎南岸坐在河流之中必須建壩築隄釘椿拋石方免冲刷之虞應修要工渠寬三丈至三丈七八尺不等深五六尺至丈餘不等長六里有奇先經奴才指明緊要處所囑令認真妥修務期堅固以垂永久茲奴才週歷履勘其所辦要工六里有奇一律完竣委係十分堅固自五月興工至今計期四月有餘除料物不計外實用工十萬有零據林則徐原呈

內稱林則徐受恩深重獲咎遣戍遇此開墾要務尤宜踴躍急公情愿認修龍口要工藉圖報効將來工竣斷不敢希冀乞恩等語查林則徐到戍已及兩年深知愧奮奴才每於接見時留心察看見其賦性聰明而不浮學問淵博而不泥誠實明爽歷練老成洵能施諸行事非徒託空言以炫目前者比久經聖明洞鑒奴才鼠目寸光平生所見之人實無出其右者竊謂人才難得如林則徐之遣戍伊犁實爲應得之罪然以有用之材置之廢閒之地殊爲可惜如蒙天恩棄瑕錄用俾得及時報効林則徐必倍深頂感再造成竭力圖報實可收得人之效奴才與林則徐素不相識斷不敢自蹈欺飾之愆實爲人才難得起見不揣冒昧手繕密陳伏乞聖鑒謹奏

清單三按此單道光硃書布查奏及一

謹將統轄各路都統參贊辦事領隊各大臣及提督總兵官等密考清單恭呈御覽

伊犁參贊大臣舒興阿安詳謹慎辦事留心

東路各城

烏魯木齊都統惟勤心地明晰辦事和平

烏魯木齊提督成玉現年六十五歲人老成熟悉營務

烏魯木齊領隊大臣成山人忠厚供職勤勉

署理哈密辦事大臣恒敏辦事謹飭勉力趨公

哈密協辦大臣安成循分供職

巴里坤領隊大臣景亮到任未及三月照例不加考

吐魯番領隊大臣海枚趨公奮勉近來亦守分

古城領隊大臣毓書現年六十三歲人誠實循分小心

庫爾額喇烏蘇領隊大臣現在出缺

巴里坤鎮總兵官伊隆阿綠營年久勉勵屯操

南路各城

葉爾羌參贊大臣麟魁現已奏請開缺

葉爾羌協辦大臣賽什雅勒泰係奴才胞弟照例迴避

阿克蘇辦事大臣札拉芬秦人安詳辦事平穩

烏什辦事大臣維祿才具平庸

烏什協辦大臣興貴雖慎小心而邊務未能熟諳

庫車辦事大臣德全謹守規矩年力正強

喀喇沙爾辦事大臣書元辦事謹慎惟於蒙古情形生疎

和闐辦事大臣奕山樸實直爽通曉回情

喀什噶爾辦事領隊大臣開明阿撫馭合宜辦事勤奮邊情熟諳勇敢有爲

英吉沙爾領隊大臣齋清額人歎誠實才具亦屬中平

喀什噶爾換防總兵官豐仲人平靜盡心操防

北路一城

塔爾巴哈台參贊大臣湍多布現年六十六歲熟悉該處情形

塔爾巴哈台領隊大臣明慶人安分熟練弓馬

塔爾巴哈台領隊大臣花沙布心地巧詐惟圖利己不顧事之輕重

清軍四按此單道光硃書〔布彥泰〕舒興阿〔及〕三十五年等字

地三百七十一

謹將伊犁各領隊大臣及屯鎮總兵官等密考清單恭呈御覽

巴彥岱領隊大臣豐紳年富力強辦事循分

錫伯營領隊大臣奕經甫經到任容再察看

索倫營領隊大臣忠泰勤奮勇敢習練鳥鎗熟悉邊務

察哈爾營領隊大臣佛爾金布誠實勇敢弓馬勁強遇事能知輕重爲外夷

所畏服

額魯特營領隊大臣錫拉布樸實謹慎熟悉外夷情形

屯鎮總兵官台湧實心整頓任怨任勞營務屯工大有起色已著成效

片四

再密奏者近年陝甘各營多有本地人員輾轉營謀署缺各提鎮以其熟悉地方情形倚爲耳目腹心無弊不作因而弁兵不能心服遂敢恣肆抗違爲上司者鮮能潔己奉公動輒被其挾制不能不凡事顛預以爲自全之計故致一切

廢弛遇賊則惟知遁逃在營乃肆意犷悍相習成風積重難返固原提標爲尤甚實由胡超在任年久因循之故現任提督石生玉雖稱陝西澄城縣人實由固原標兵歷陞蒙恩擢任今職自當竭力整頓以圖報稱而挽頹風無如標下弁兵多半昔年等輩不無有所瞻徇仇懷瑛之署提標中營即係該提督到任後輾轉調署而仇懷瑛之子仇永清資淺年輕拔缺擬正係該提督所揀定不能謂非徇私迨經臣查明撤署改委邊缺即捏病規避該提督并不據實揭報反爲轉請開缺回籍是通同舞弊於前更相率桀傲於後似此任性負氣營務難期整頓謹將石生玉於陝西提督不能振作緣由據實密陳伏乞聖鑒謹奏

片五

再查蘭州道駐劄省城時有委辦案件凡遇要事面商與兩司同參論議該道專司茶馬近年甘莊各司茶務商疲引積比較催徵尤關緊要非實心任事不徇情面之員難資整頓查蘭州府知府岳齡年五十一歲廂白旗蒙古人在軍機章京上行走十有餘年歷陞理藩院郎中京察一等奉旨記名以道府用道

光二十六年十月奉旨補授寧夏府知府調補首府該員老成體面辦事精詳在軍機處多年通曉政體識見開展前經委護蘭州道篆辦理裕如實爲通省知府中出色之員如蒙天恩以岳齡補放蘭州道於省會要缺地方公事實有裨益臣爲人才難得起見不揣冒昧謹附片密陳伏乞聖鑒謹奏

片六

再新陞廣西藩司雲麟明幹老成經臣於年終密考填註久邀聖明洞鑒本年三月間見該司步履微形蹇滯語言亦稍遲緩當經詢其原委據稱上年由鎮迪道調任進關途次感受風濕右手足曾患麻木無力旋卽醫治就痊入春後偶感風寒不免牽動舊疾等語經臣囑令加意療治並以臬司爲刑名總匯任重事繁如或病勢難支卽應據實呈報以憑代奏請假該司自揣所患僅止腿軟精神飲食均係照常不至誤公未敢遽行請假以圖安逸臣隨時察看入夏以來該司起跪言動漸次復元公事從無貽誤是以未經陳奏茲雲麟仰蒙簡授廣西藩司現已交卸臬篆自省起程惟藩司有澄叙官方出納財賦之責較

臬司職任尤爲重要該司風濕舊疾雖已就痊難保不再舉發未敢因其已離甘省便存緘默又甘肅寧夏道朱煌履歷雖開六十五歲實已年逾七旬去冬到任時察其精神尙好本年六月內聞該道忽患風痰病症現雖調治就痊而精力已衰難期振作臣不敢稍涉廻護循隱謹附片密奏伏乞聖鑒謹奏

片 七

再臣承准軍機大臣密寄道光二十九年正月十二日奉上諭前據布彥泰奏年終密考一摺內稱學政王祖培按試各郡雖未致招物議而關防未見嚴密等語該學政如何關防不密有無實據著布彥泰確加訪查據實覆奏毋稍含糊將此密諭知之欽此伏查該學政王祖培於上年八月按試蘭州府時臣近在同城稔知其前後屆試生童於點名封門後僅委教職監場並不常川在堂親自稽查考試武童步箭亦未循例前赴校場即在貢院內考校因地丈不敷弓數毀垣安立箭靶臣目擊該學政考試省郡場規如此隨向已經按考之各府州密加查察情形大致相仿尙無別項物議是以臣於年終密考單內將該

學政關防未見嚴密之處遵旨切實填註茲蒙垂詢臣復詳加訪查此外並無別項實據謹附片據實密陳伏乞聖鑒謹奏

寶

興字獻山隸鎮黃旗嘉慶十五年進士累遷少詹事十八年擢內閣學士

道光初歷左副都御史兵部侍郎署四川總督逾年實授二十一年拜文淵閣大學士留總督任二十六年

入覲留京管刑部二十八年卒

摺一

大學士四川總督臣寶興跪奏為遵旨密切查明據實恭摺覆奏仰祈聖鑒事竊臣承准軍機大臣密寄道光二十三年二月初五日奉上諭前據孟保等奏廓爾喀國王呈進表文添叙該國屢被披楞欺凌求賜銀兩發兵堵禦等情當已諭令孟保等開導駁斥并給發硃筆改定檄諭令其遵照繕發矣因思廓爾喀與披楞構衅本屬蠻觸相爭原可置之不理惟既繕入表文自應密為查訪究竟該國與披楞如何構衅其表內添叙之處及該通事傳說之語或係通事慫恿添捏著寶興密委幹員將廓爾喀與披楞構衅情節查訪明確并將該通

事人等有無慊愆情事確切查明據實具奏仍飭該委員等不動聲色密行偵探切勿張皇漏洩爲要將此密諭知之欽此臣查廓爾喀距成都省城一萬餘里委員訪察恐未必得實其時該國使臣噶箕等業已出京俟其回抵川省時就近設法偵防庶可悉其真情隨於省標弁兵內暗爲留意有提標中營馬兵馬永昌通曉廓爾喀語言即預行存記至四月初十日該使臣噶箕等行抵成都臣因上年十月間到川筵宴時亦有廓爾喀屢被披楞欺凌欲求皇上賞銀發兵之語曾經臣面駁諭以大義常傳馬永昌至署止將噶箕上年向臣稱說之詞密向諭知令其改裝易服前往將披楞如何與廓爾喀構衅噶箕所言是否真實抑係通事傳話不確有無從中慊愆之處隨機密切訪詢不得稍漏風聲馬永昌即扮作貿易商販假赴夷館售貨有一夷人因其能說夷話邀令入室叙談詢知該夷人名喚麻魯其官銜係雜瑪達熱該馬兵馬永昌連日與之間叙乘機探悉該國王現年二十八歲其國南界披楞東界哲孟雄西北與生巴連界東北即係藏衛惟西面所管地土最廣有兩月餘路程總計該國兵卒共有八九萬因該國王之父前與披楞挾有舊恨連年交兵皆爲披楞所敗西

面地方致被占去一半並詢以披楞與噶咭喇是否連界據麻魯答稱噶咭喇另係一國隔披楞尙遠復詢以爾國既有多兵因何將地被入佔去據稱因勝負難料兵糧不繼是以不敢與披楞打仗近來披楞復有侵凌之意國王甚爲憂慮恐兩相爭持日久糧食不能接濟是以此次求大皇帝恩典賞借兵餉以防不支等語伏查雜瑪達熱麻魯係此次隨從頭人馬永昌前往探詢該頭人并不知係有意訪查無心之酬對所言諒多真實况道光十七年廓爾喀遣使呈貢表文內已叙有求賞銀兩以備防堵之語曾經駐藏大臣具奏此次仍行添叙自係該國王故智該通事李國安係隨後由西藏派委件送似無從慫恿且體察李國安於廓爾喀言語并不十分熟悉亦未必捏飾就現查情節而論披楞與廓爾喀交兵係屬從前之事近雖復圖侵佔尙屬該頭人懸擬之詞并非實被欺凌臣於該使臣等謁見時復細加查看該噶箕等惟稱此次仰蒙大皇帝高厚鴻慈優加賞賜噶箕等實在感激之至惟有回至本國告知國王永戴天恩等語其詞色極爲恭順榮幸并未再言前事是該國王妄乞恩賜可見亦非實有急迫之情臣隨將噶箕等酌加獎勵諭以回國後務當隨同國王安

撫百姓輯睦隣番以仰副大皇帝綏安番服之主意該噶箕等均各懽欣鼓舞而去所有遵旨密切查明緣由理合據實恭摺覆奏伏乞皇上聖鑒謹奏道光二十三年四月二十五日硃批覆奏甚屬明晰知道了

片一

再查川省之德爾格果洛克均與西寧青海連界德爾格在阜和協界外果洛克在漳臘營界外皆係蠻荒地地方遼闊處處皆通現在甘省查辦野番官兵雲集其勢自必披靡難保不四路逃竄臣已檄飭阜和漳臘等協營將備實力操防以壯聲威並每月加添巡哨次數按期與毗連營汛在於沿邊附近一帶揚兵會哨巡邏俾遠番聞風震懾並嚴切譯諭德爾格果洛克各土千百戶等率同土兵番衆各就部落慎守邊界如有外來賊番竄入立即捕擊擒拿解究不得容匿臣仍隨時派員前往密訪倘各該營員操巡踈懈卽行從嚴指參並札松潘鎮總兵一體飭防以固藩籬而清邊境理合附片奏聞伏乞聖鑒謹奏硃批甚好

片二

再廓爾喀貢使噶箕等事竣回國行抵成都省城後臣會同成都將軍臣廉敬查照向例給予筵宴因其遠道跋涉當令在省暫爲歇息整理行裝現於四月二十二日自省起程前赴打箭爐城出口沿途飭委文武大員逐程護送其所需夫馬預飭經過各州縣及口外各糧員一體照例預備妥爲應付前進理合附片恭奏伏乞聖鑒謹奏硃批知道了

摺二

大學士四川總督臣寶興跪奏爲遵旨據實覆奏仰祈聖鑒事竊臣承准軍機大臣字寄道光二十四年三月二十八日欽奉上諭據寶興奏提督齊慎因病出缺已明降諭旨加恩賜卹矣四川提督統轄全省營務責任綦重因思建昌鎮總兵張必祿曾任該省提督近來辦事精神能否照舊現調重慶鎮總兵托明阿該督稱其曉暢營務訓練嚴明該二員孰勝四川提督之任著該督詳加

察看據實具奏此外各省總兵中該督如有真知灼見堪勝提督之任者並著秉公覈實具奏將此諭令知之欽此仰見皇上慎簡務在得人尤復垂詢諄諄下懷更增悚懼伏查建昌鎮總兵張必祿現年七十歲上年自廣東軍營回川時曾多疾病本年二月間臣前往查閱建昌鎮屬營伍見其病已醫痊精神照舊強健整頓器械日不釋手該鎮賦性耐勞任事勇敢經理一鎮之事洵有餘裕且素爲夷人畏懼在建昌鎮尤爲人地相宜新調重慶鎮總兵托明阿年五十八歲曾於道光六年出師喀什噶爾著績蒙恩賞戴花翎該鎮曉暢營務於事之緩急輕重操縱亦能得宜前署提督篆務練兵之餘常與將備講求大義詳察該兩鎮張必祿以膽勝托明阿則識優彼此各有所長若以之當提督重任似托明阿較爲穩妥此臣管見所及伏候聖裁至於各省總兵中臣雖有所知不過得自傳聞是否果有才能究無明試不敢冒昧具陳謹遵旨據實恭摺覆奏伏乞皇上聖鑒謹奏道光二十四年四月二十五日

中華民國二十年六月一日出版

史料旬刊第三十七期

編輯所 故宮博物院文獻館

發行所 神武門外發售室

印刷所 京華印書局



		郵費		價目表	
		外埠	國內	每旬一冊	每冊
本市	每期一角	每期二角	六元五角	四角	十二元
	每期二角			十八冊半年	三十六冊全年
上海	每期一角	每期二角	六元五角	四角	十二元
天津	每期一角	每期二角	六元五角	四角	十二元

本院發寄刊物均交郵局掛號遞送以免遺失

商務印書館 中華書局

文明書局 世界書局及

其他各大書店均有代售